

欽定剿平三省邪匪方略

欽定剿平三省邪匪方略正編卷一百八十二

庚申年

五月二十四日^{乙巳}勒保奏言查高二馬五等股

匪衆自在新寨剿殺後大衆仍屯鐵爐寨總欲

向白馬路番地衝出直趨龍安連據該處文武

稟報深恐番兵不能得力而百祥又在小河營

一路難以兼顧^臣一面商令七十五相機進剿

一面卽與阿哈保酌帶兵勇間道馳往龍安策

應初七日抵龍安後山之鐵籠堡據報初二三等日賊匪連次撲卡均經漢番官兵擊退斃賊數十名初六日復有藍白旗三桿率衆千餘人直撲白馬路營卡適

臣

先派前隊叅將張大振

一路官兵趕到率同土通判王璣長官司王嶼帶兵迎擊併力下壓追過兩重大山斃賊七八十名生擒七名餘匪潰遁其勢欲由三舍直奔

松潘當令百祥連由小河營進至三舍迎截

臣

亦督兵繼進旋據七十五報稱初五日五更分
兵三路進攻鐵爐寨連奪賊卡四座殺賊一百
餘名生擒賊匪符志勤等六十三名搶獲賊馬
賊礮旗幟器械七十餘件正在進攻雷雨交作
因在對面山包暫紮營卡是日打仗遊擊湍多
布奮勇撲卡卒中鎗傷陣亡所傷兵勇無多奈

雨勢徹夜不止匪衆卽乘夜潛逃七十五聞信
亦卽冒雨督兵追剿該處多係箐林我兵崖口
轉灣之處賊已將偏橋折斷七十五一面督兵
修路一面派令叅將張志林帶領土兵二百名
攀藤附葛直上山巔見山腰尙有伏賊數十人
守拒該土兵出其不意下山掩捕立斃賊十七
名生擒賊目陳維玉並賊匪穆寅兒等九名訊

據供稱馬五等因見大兵到來鐵爐寨不能踞守商量趁此雨夜率衆奔逃將前隊分作兩股向羊肝山白馬路兩處衝撲派留我等折斷偏橋在此埋伏即可堵住官兵追趕不上等語實屬詭詐可恨七十五卽於次日催兵追躡詎該匪等因官兵逼緊而白馬路又未能衝出遂合夥向羊肝山二道橋併力衝撲營卡叅將增順

不能抵禦退回南坪

臣

查南坪地勢散漫該匪

非走松潘卽入甘肅番地一面飛催七十五由

湯注河黑革拉一路盡力窮追一面挑派奮勇

弁兵交阿哈保趕赴百祥一路由羊岡橋黑河

塘一路馳往迎截

臣

暫駐小河營以防賊匪折

竄現據探報賊匪屯踞南坪下較場逕來攻城

經奏將增順督兵擊退斃賊二十餘名賊匪等

旋又分股至野焦關甲霧溝撲卡該二處先經
廣厚安設卡隘賊匪當被兵番擊敗不能再竄
文縣均由黑河口一路奔逃查黑河西達松潘
北通甘肅土司楊宗業番地前據廣厚稟報此
一帶凡通西固洮岷之路如草坡梁青山梁大
舍山梁等處均經委員分設營卡嚴密防守惟
洮岷等處兵備空虛現在七十五旣緊躡追剿

廣厚若帶兵由文縣而來又在七十五之後是以擬由階州馳赴洮岷偵探賊蹤迎頭邀截與川兵兩面夾擊方能有濟惟自文縣以至洮岷道路較遠恐難朝發夕至

臣

現飛催阿哈保七

十五兩路官兵必須分一路抄出賊前將匪衆

截回務於松潘境內卽速辦竣萬一賊由番地

闖入甘境

臣

既不便越境追剿應凜遵

諭旨分兵大半交與阿哈保統領前往追剿現已挑
派兵勇五千餘名交阿哈保以備臨時帶往但
兵數稍多阿哈保向來祇帶馬隊於綠營官兵
不甚熟悉總兵百祥現與阿哈保同在一路卽
令該鎮前往幫派可期得力

勒保又奏言前奉

諭旨以總兵百祥在龍安防守何以任賊匪由甘竈

入令

臣

查明具奏查龍安松潘兩屬地方遼濶與

甘省文縣西固洮岷等處在在可通總兵百祥

先因冉添元等股賊匪竄近昭劍經魁倫派令

帶兵駐紮白水防守龍安要路嗣因高二馬五

有自甘竄川之勢復經魁倫將龍安南坪一帶

卡隘飭令該鎮就近督率嚴防當賊匪由哈南

寨草地溝一路竄入川境時百祥正在白水寨

營相距尙有二百餘里追聞信往堵賊已闌入
松潘境內查松潘鎮事務係叅將增順代辦

臣

因其前在雪攔關等處屢次截殺賊匪甚爲勇
往是以未經查叅原冀其知所感奮將松潘各
要隘實方嚴防遏賊竄回甘省之路卽可在番
地辦完乃此次賊從羊肝山二道橋一帶衝出
卽係叅將增順親自安設之營卡是其守禦不

力之咎實所難辭自應請

旨嚴辦未便因其前有微勞卽予寬宥且功過亦不足相抵現已將增順擢去頂戴卽在南坪柳號示衆應請俟軍務告竣發往伊犁充當苦差總兵百祥於前次賊匪自甘竄入川境該鎮乃係督防大員本難辭咎惟查賊匪竄入之路與百祥相距較遠現因帶兵乏人令其與阿哈保赴

甘協剿相應請

旨將百祥革去提督銜拔去花翎以示懲儆而觀後
效同知洪範前在雪攔關與增順帶領兵勇打
仗頗爲出力此次賊由南坪竄出該員在松潘
守城與伊無涉查該員本已

賞戴花翎現在應否仍加鼓勵之處出自

聖主天恩再土知事薛祥前此賊竄龍安將番兵衝

散薛祥不知下落先經奏明在案嗣據土通判王璣稟報緣薛祥受傷滾跌山溝旋經該番兵等在溝內找獲現已調理就痊均奏入

上命軍機大臣傳諭勒保曰甘省高二馬五等股賊匪前據勒保奏已全數逼入番境自投絕地滿望勒保乘賊窮竄之時趕緊追擊將此股賊衆悉行剿淨一俟捷音奏到方欲加恩乃辦理多日又任

賊匪由黑河口一路懸轉奔突非西入松潘卽北
竄甘肅土司楊宗業番地雖由泰將增順不能抵
禦退回南坪致令賊匪乘間奔逃但究係勒保調
度不善無福承受朕恩勒保前因獲罪革職拏問
經朕棄瑕錄用復委以剿賊之任俾伊立功自効
今又不能安速籌辦縱賊奔逃又應革職拏問但
勒保於獲罪之後甫經錄用若復將伊治罪則該

省屢易總督大員未免起賊輕視之心況復成何政體勒保姑著先行革去花翎以示薄懲再觀後效勒保惟當幫同德楞泰上緊剿辦將川北各股賊匪次第剿盡尙可邀恩若再不知感恩出力必將伊從重治罪勉之其高二馬五等竄匪勒保現已派七十五阿哈保等分路抄擊如能將賊匪截回在松潘境內卽行辦竣勒保尙可稍贖前

愆萬一由番地闖入甘境卽著阿哈保百祥帶兵
追剿倘賊匪被甘省剿急復行折回勒保務須飭
令七十五薛大烈奮力截擊不可又任往來奔竄
至叅將增順前於賊匪由哈南寨草地溝一路竄
入川境時係伊代辦松潘鎮事務疎於防範實有
應得之罪今賊匪又從伊安設營卡處所衝出增
順旣不能奮力截擊竟退回南坪是其疎防玩愒

獲罪甚重勒保所擬尙輕增順著卽革職拏問交
勒保提到將伊罪狀嚴行審訊明確卽在軍營正
法並傳集帶兵員弁看視行刑仍通傳各營以增
順防堵賊匪如果能奮力殺賊卽被賊戕害尙可
卽邀卹典今竟先行退避任賊衝出以致身罹國
法各路防堵員弁不可不以增順爲戒俾衆人知
所儆惕又百祥係派在龍安一帶督防大員前此

賊匪自甘竄入川境已難辭咎今於增順疎縱賊
匪又不能預爲督飭防範僅行革去提督銜拔去
花翎亦不足蔽辜百祥著降爲叅將戴罪効力以
示懲儆其重慶鎮總兵著德楞泰勒保於軍營出
力人員內保奏二員候朕簡放百祥現經勒保令
與阿哈保赴甘剿賊務須自知感懼力圖自贖卽
阿哈保亦係曾經獲譴之人不可不倍加奮勉也

至托津廣興現已飭令回京其達州辦理糧餉事宜應於楊揆先福劉清三人中酌派一人前往接辦務期供運無悞所有此次殺賊陣亡之遊擊湍多布著咨部賜卹

同日廣厚奏言

臣

接據探報川省賊匪由窩閣

翻山竄至南坪與文縣西北界相近現經勒

保躡蹤緊追

臣

恐該匪仍向從前舊路奔竄隨

分派都司胡大全在南坪交界之野猪關申霧

溝大驛城三處山梁拏立卡座派遊擊陳五輯

都司劉天秩在文縣界外之椿樹壩臣帶同知

州胡紀謨徐學采在文縣之哈南寨竹元壩各

帶弁兵嚴密守禦賊至南坪探知各路有備遂

西竄松潘之黑河向二道城打蛇溝一帶竄遁

該處係松潘所屬距文縣西北已二百八十餘

里向西仍係松潘地界西北翻山卽係卓泥土

司楊宗業地方由彼卽通西固洮岷臣前已飭

諭楊宗業多集番旗兵民防守隘口但其所轄

地界遼濶番民又素懦弱未足深恃甘省現在

祇有臣一枝兵力而揣度賊匪奔竄情形又有

川兵隨後追趕自不能再折文階且文縣在西

固洮岷東南相距數百餘里及千里不等臣一

面飛咨臬司兼開陽就近調兵二三千名派赴
洮岷適中之地擇要駐紮以杜賊匪北竄臣一
面帶兵卽日自文縣拔營由洪州兼程馳赴西
固岷州一帶探蹤相機遏截奏入

上命軍機大臣傳諭廣厚曰廣厚帶兵防堵向來尙
屬妥善此股賊匪係由勒保所派之叅將增順防
堵不嚴以致乘間竄近卓泥土司楊宗業地界並

非廣厚堵禦不力所致廣厚惟當妥爲佈置嚴密防範不使竄匪深入甘境致土司地方遭其蹂躪爲要昨據台布奏陝省賊匪竄至黑河該處卽係甘省地界逼近兩當徽縣台布雖令索費英阿長春等在西面防堵尙恐不能得力已降旨令額勒登保撥兵二三千名交楊遇春帶領由捷徑前赴棧道之西繞出賊前幫同攔擊如能截回陝省固

屬甚善倘楊遇春一路不能攔截已另論寧夏將軍蘇寧阿酌帶弁兵前往協剿廣厚此時雖不能兼顧亦當留心不時探聽賊匪確蹤飭屬堵禦至廣厚現當防堵緊要之時除現在令姜開陽調兵一二千名外如尙須添兵截剿自宜向甘省滿營及綠營內酌量添調仍著將如何截剿高馬二逆情形迅速具奏

上又命軍機大臣傳諭寧夏將軍蘇寧阿曰昨據台
布奏戴家營分股賊匪由小路竄至百姓溝黑河
等處黑河西通徽兩南通畧陽汴縣責令索賈英
阿跟蹤攔剿等語黑河在棧道之西卽係甘省地
界與徽縣兩當接壤可以直趨秦隴雖經索賈英
阿躡蹤追剿尙恐不能得力業經諭令額勒登保
酌分兵力交楊遇春帶領由定徑迅運繞出賊前

與索費英阿奮力攔擊現復據勒保奏所剿高二
馬五一股賊匪又由龍安竄入甘境番地已派阿
哈保百祥帶兵五千名前往追剿廣厚現已帶兵
馳往堵截或可無虞他竄惟戴家營分股賊匪已
由黑河竄入甘境必須上緊截回庶秦隴一帶可
保無虞如楊遇春能將此股賊匪截回陝境固屬
甚善倘楊遇春一路不能攔截而廣厚一路現在

西固岷州一帶堵禦亦不能兼顧著蘇寧阿卽於所管滿營及附近綠營兵丁內酌量調派一面確探竄過黑河之賊匪如業經楊遇春等截回蘇寧阿卽無庸前往如未經截回卽帶領所派兵丁速赴兩當徽縣一帶迎頭截擊幫同剿辦

二十五日

丙午

上命軍機大臣傳諭蘇寧阿定住日昨因戴家營分

股賊匪已由黑河竄近甘省恐楊鴻春索費英阿
未能截回當經降旨令寧夏將軍蘇寧阿酌帶官
兵前往協剿今又思蘇寧阿年老且寧夏地方懸
要未便遠離蘇寧阿可不必前往現在額勒登保
屢獲勝仗陝境賊勢漸蹙該處帶兵大員亦不
乏人定住前經帶直隸兵八百名前赴經畧軍營
著接奉此旨後不拘行至何處卽由捷便取道帶

領原兵迅速馳赴徽甯一帶幫同楊遇春等截剿
戴家營一股賊匪若定住到彼楊遇春等已將賊
匪截回固屬甚善倘賊匪仍在甘境定住卽當視
賊所向探蹤截擊該提督素嫻紀律人亦勇往若
能將此股賊匪殲盡無遺必當加之恩賚至寧夏
官兵蘇寧阿仍當酌量挑備或定住及廣厚姜開
陽楊遇春等因兵力不敷有向寧夏咨調之處卽

可派員帶領前往蘇寧阿務當挑選壯健兵丁并
派定管帶之勇幹營員聽候調撥可也

同日

上諭內閣曰朕自上年親政之初辦理和坤等一案
彼時那彥成本係軍機大臣朕看其應對明白似
有出息且係原任大學士公阿桂之孫原冀其京
繼家聲以備任使是以疊次加恩擢用尙書都統

派令管理戶部三庫崇文門稅務及各處事務較
他人爲多實欲造就成材並非偏厚於那彥成也
伊於該管部旗及各處事件均非一人獨辦尙未
見短每日召見時於朕籌辦軍務宵旰靡寧一切
皆所深悉嗣因勒保明亮等先後獲罪軍營乏人
更換朕以那彥成正當壯年應有志上進況曾目
覩

皇老爲軍務焦急直至

龍馭上賓之日未能解釋滿望伊前往督辦或能截事
仰慰

在天之靈減朕之咎是以派赴陝西軍營授以欽差大
臣關防代明亮統領一路軍務那彥成亦直任不
辭而陛辭之前屢次陳奏伊到軍營如不能卽時
打仗求免催促俟可以打仗時卽不遺餘力奮勇

直前等語預爲佔脚地步彼時朕心卽覺不愜然
業已派令前往亦無忽行中輟之理那彥成出京
後途間行走已屬遲緩及到川省接剿張漢潮餘
匪漫無布置惟尾隨賊蹤深入老林遷延數月迄
無成效彼時大兵俱在山內輾轉跋涉此外全無
官兵是以川省之賊乘間竄入甘境那彥成如果
能及早分派官兵於陝省邊界悉力截剿則賊匪

自必仍折回川額勒登保即可毋庸赴甘將川省
之賊一手督辦何待交付魁倫致有任聽賊匪竄
過嘉陵江潼河擾及川西完善地方之事無如那
彥成惟知在老林盤旋全置他賊於不顧以致竄
廿之賊日久蔓延川東川北之賊竄渡川西額勒
登保不能兼顧魁倫因此獲罪雖經德楞泰在川
西疊次剿殺賊匪仍行竄過嘉陵江以東荼毒無

數生靈費却無限兵力僅能將川西之賊截回若
溯其失算之由皆那彥成在老林耽延所致用人
不當朕深引以爲咎當額勒登保督兵赴甘時張
漢潮餘黨業由老林逸出那彥成屢奉嚴旨始帶
兵往甘省截剿惟於龍山鎮得有勝仗一次殺賊
尚多此後額勒登保追賊入陝那彥成在甘辦高
二馬五一股雖亦有斬獲而餘匪數百人由甘省

白水江竄渡闌入川境那彥成並不緊蹙追剿乘其衰敗一鼓掃淨輒將此股賊匪委之總兵百祥徑帶兵赴額勒登保一路以致高二馬五等賊竄近龍安復行裹脅幾擾及附近省會地方經勒保督同鎮將等屢次堵剿致奮勇得力之總兵施縉因此陣亡賊匪被官兵剿急仍由松潘番地竄近甘境現在阿哈保等帶兵繞截是否能攔回川境

剿盡此股尙未可知此皆那彥成棄垂敗之賊留遺餘孽以至於今也朕因那彥成在軍營不能得力且恐掣他人之肘是以召令回京以便詢問軍營實在情形其在老林內耽延之罪縱賊入陝甘之罪及縱賊入川之罪僅予薄懲將軍機大臣及所管各處事務斥退仍留其尙書都統各大缺並雖戴花翎留經筵講官銜乃係格外加恩朕曾而

論在京軍機大臣等方以那彥成接奉召回之旨
自必懇請仍留軍營卽虛詞敷衍亦必應如此而
朕亦斷不允所請必令來京乃那彥成得旨召回
卽束裝就道摺內並無懇留一語到京時連日召
見朕微試其意亦總未懇請復行前往是其視軍
營爲畏途肺腑如見迨朕細詢軍營情形語及添
兵則以各省無用之兵添調何益語及添餉則以

如此虛糜餉項殊屬不值至辨賊之道不外剿堵
二者那彥成則以官兵追剿賊匪愈遠愈疲勢難
剿盡及語以防堵機宜伊又以爲兵勇皆疲堵亦
無益前因楊開甲一股竄至洋縣地界王文雄督
兵截剿其由白沙渡踰渡之賊有把總王培璉赤
身扛礮淌水轟擊不令過江西竄朕方加之獎許
而那彥成則以爲不如聽其竄往川境又戴家營

一股賊匪竄至黑河有欲趨徽縣兩當之勢朕卽
令楊遇春定住分兵繞道前往攔截那彥成轉以
爲不如縱令入甘地勢較平轉易辦理若果如此
則那彥成在甘境辦賊何以不行剿淨又任其分
竄川陝乎那彥成似此措語游移毫無把握已非
奏對之體乃昨復召見詢以陝省賊情據稱皇上
洪福自能剿淨賊匪譬如蝗蟲非人力所能捕淨

况此事總關刼數如果刼數已盡卽現在守卡無
用之兵一人亦能殺賊十數人若刼數未完卽有
健將如扎克塔爾慶成等帶領精兵亦不能得力
此何語耶聞之令人寒心朕又論及額勒登保現
今連次得勝之事那彥成復以額勒登保所奏如
果不虛再得一二仗卽可將陝賊辦竣其意不過
因伊甫離軍營額勒登保卽連獲勝仗心懷忌妬

爲此將信將疑之語欲朕猜疑額勒登保阻其成
功此等居心豈能逃朕洞鑒試思那彥成於前月
二十七日自軍營起程額勒登保卽於是日督兵
奮剿將張漢潮餘黨之在陝省者先行辦竣旋於
手扳崖續得勝仗又將伍金柱一股助惡之首逆
龐洪勝殲斃前後殺賊幾及五千人豈竟全不可
信且詢以川楚軍營情形據云全不知悉恐亦不

免虛誑等語豈德楞泰將川西之賊痛加剿殺截
回川東川北亦全係子虛乎那彥成游詞熒聽其
心實不可問若如伊所云一切堵剿俱屬無用兵
餉亦不必添惟委之刼數聽賊自斃此乃心存膜
視袖手旁觀竟似事不可爲置身局外者那彥成
身爲大臣又係阿桂之孫受

考及朕厚恩至爲優渥何忍爲此搖惑人心之語尙

得謂之有天良耶朕召見軍營回京之人原以其
身歷戎行見聞自確與懸揣臆度者不同冀其稍
有畫策贊助萬一卽如松筠亦係朕由西藏召回
擢任陝甘總督因其辦理未能妥協調任伊犁將
軍又因楚省帶兵乏人令其暫署督篆同明亮等
剿辦楚境賊股而松筠奏稱患病不能督戰懇請
來京面陳軍務朕不得已姑允所請及至到京詢

以方畧惟屢請將私鑄私鹽全行弛禁以斷不可
行之事瀆奏不休然伊於軍務情形則以團練鄉
勇裁撤疲兵及分路堵剿爲要尙非漠不關心毫
無所見是以僅示薄懲將伊降爲副都統職銜前
往伊犁作爲領隊大臣乃諒其愚悃曲加寬貸若
那彥成屢次奏對無一的實之語全係一片私心
初次召見時尙自認無能負罪引慝繼則毫無愧

懼矢口亂道率爾而對豈竟以此等伎倆在朕前
嘗試乎朕之初心未將那彥成全行斥革者本欲
曲加保全望其悔罪自効亦因簡任大臣不欲輒
行更易乃朕用人不得已之苦衷若大臣等不知
仰體朕心必欲激朕之怒朕亦非不能剛斷之主
也著將此旨交儀親王成親王大學士軍機大臣
會同六部滿漢尚書向那彥成宣示令其明白登

答由軍機處代奏若伊另有密奏之語亦令其自行書寫封交軍機處轉呈看伊有何分辯俟奏上時再降諭旨

臣
等謹案我

皇上睿謨籌筆宵旰靡寧惟期邪匪迅就殄除俾三省生靈早安衽席前

特命那彥成前往授以

欽差大臣關防原以其勲閥重臣受

恩至渥必能力矢奮勉敵愾懋功旋因剿辦張漢潮
餘匪帶兵深入老林遷延數月疊奉

諭旨所以教誠而勗勵之者至再至三此次奉

召回京不特一無籌策且率爾陳詞大失對揚之體

仰蒙

特諭訓示深切著明卽那彥成夙夜捫心實屬罪有

應得猶荷

念舊恩隆

曲加矜宥僅予左遷

成全備至爰

申命軍營帶兵大員各分地界責成剿捕凡身在行

間者繹誦

綸言蓋莫不知咸知畏教命爭先所謂

風靈流形無非教也

二十六日丁未姜晟奏言查前督臣倭什布欽奉

諭旨以高均德供稱於嘉慶元年經本縣張知縣查辦邪教將伊拏獲刑訊該犯挺刑堅供實係良民卽行釋放令該督撫查明彼時襄陽張姓知縣係屬何名因何並不切實嚴究查詢明確據實奏茲據藩臬兩司具詳嘉慶元年春間署襄陽縣

知縣卽係現任襄陽府知府張琰隨行據稟稱
是年三月間適所屬黃龍壩教匪滋事卽帶領
兵勇隨同舒亮鄂輝等節次打仗惟時並未回
署茲檢查府卷是年三月初間前府胡齊崙查
拏教頭蕭允題聞藏匿高二家內移委前任襄
樊同知蕭與潔守備王隆帶領兵役搜拏三月
初十日止將高二卽高均德拏獲解經胡齊崙

審訊並無蕭允題實在下落將高均德管押至
五月初六日張琮正隨永保在軍營辦理糧務
有襄陽縣役郭陞將高均德押解到營據稱永
保需人識認賊首經胡齊崙差役押來以作眼
目當卽隨營看管六月十四日永保以賊勢窮
威聞高均德之叔高成傑正在賊營諭令前往
解散詎該犯一去不回現有府中拏獲管押及

提解赴營日期檔案可稽呈賁稟覆

臣

前在襄

陽經倭什布移交查辦隨經面詢該府張瑤均

與所稟相符復檢查舒亮鄂輝等奏案張瑤於

是年三月實隨同打仗詳閱所呈府卷收發監

犯冊內登記高三收管開除日期一一符合是

高三卽高均德非係張瑤署縣任內拏獲審釋

實屬有據又夾河洲案內冒功各員弁

臣

謹遵

旨查明謹開具名單敬呈

御覽奏入

上諭內閣口姜晟查明從前來河洲案內冒功加銜
賞翎陞敘各員并開單呈覽此內汪新等二十七
員疏報邀恩賞爲可惡自應概予註銷以杜冒濫
其候補知縣孔繼樞陞銜頂戴一級雖係夾河洲
案內冒濫所得但伊在鄖西辦理防守事宜頗爲

得力卽前此楊開甲等股竄匪攻破蒿坪壩卡隘
亦因時屆收割該縣將防守鄉勇暫行抽撥歸農
賊匪乘間闖入該縣又係由漫川馳往是以彼時
未卽予以罷斥所有陞銜頂戴不必註銷其餘各
員除業經正法革職各員毋庸議外其已經病故
陣亡各員所有加銜陞用及在其開復之處俱著
查銷註冊已賞戴藍翎各人員俱著摘去其加給

陞銜之府經歷許宗瑛等俱著註銷

同日

上諭內閣曰那彥成外似有才中無把握見機遲鈍
遇事狐疑不聽人言自以爲是此次軍前叅贊雖
有微功不能掩咎本應革職發往伊犁効力贖罪
但阿桂之子孫半年內俱行遣戍朕心實有所不
忍伊等縱不念乃祖乃父朕豈可不篤念老臣乎

那彥成在外不能決勝千里在內不能運籌帷幄
洵爲無用之物分宜置散投閒著革去尙書都統
講官拔去花翎格外施恩用爲翰林院侍講在

實錄館効力行走八年無過方准食俸至軍營情形較
前大有起色兵精糧足帑項充盈額勒登保等三
人實能殄寇秋冬之間必可收功內外諸臣除軍
機大臣外毋得干預軍務莠言煽惑違者不貸

三十日辛亥明亮倭什布奏言竊徐添德等大股

賊匪前於烟墩集剿敗後向當陽一帶逃竄臣

等隨探得當陽之東有大河一道名消溪河因

大雨驟漲水勢寬深賊匪斷難竄越正可趁此

機會由董家坪廟嶺一帶抄過賊前迎剿若能

逼至河干可期痛加殲戮當卽鼓勵兵將於十

六日早奮勇進發詎該匪等探知河水難渡後

有追兵隨留馬賊五六百名步賊二千餘名潛

赴前途之天柱山節節埋伏計圖抄截我兵之

後

臣

等行至該處見山勢散漫樹林深密隨令

兵勇周圍偵探瞥見各處山溝樹林內俱有賊

匪伏匿當令各兵紮住派總兵孫清元與叅將

吉林泰等帶領兵勇直前迎剿

臣

等各帶將弁

兵勇由左右兩翼隨截隨進該匪等集爲三股

分投迎撲我兵鎗破齊發擊斃多名賊匪猶敢
捨命蜂擁迎拒自己至戌連撲數次俱被我兵
奮力壓下計斃馬步賊匪約二百餘人生擒惠
之順等二十七名奪獲旗幟器械甚多官兵亦
有傷亡時已薄暮各匪俱敗回深林內藏匿次
早探知全隊之賊乘雨夜翻山越嶺由東而旁
竄_臣等料賊不能渡河必圖繞由荊門東南另

覓別徑遁逃當卽帶領兵勇由捷路抄至鄰家

集適遇賊匪狂奔而來一見官兵卽分股四路

奔逃_臣等與孫清元分兵追擊賊匪且戰且走

官兵窮追三十餘里沿途斬獲甚衆散出被裹

民人三十七名二十一日賊匪分竄附近荆門

之掇刀石青龍觀等處希圖窺伺州城_臣等與

孫清元帶兵分投兜剿該州張琴亦率領鄉勇

暫同截殺共鎗斃騎馬賊匪二十餘名步賊一百餘名生擒探馬頭目秦朝相一名散賊劉正普等十七名賊匪慌亂由荆門北面之水府廟王陵橋等處連夜亡命狂奔俱向西北之劉猴集仙居一帶逸去州城保護無虞四廂居民均未被賊擾害隨訊據獲賊秦朝相等供稱該匪等因官兵抄剿緊急且湖北地方多有河水阻

隔欲由竹谿竄回平利餘無要供當卽正法所
有被裹民人俱各訊明住址給照遣回查賊匪
現竄之仙居等處係通南漳遠安等境卽可通
歸山內聚而殲洗亭機尙屬順利現在姜晟已
抵荆門業飭南漳等縣厚集義勇於緊要隘口
迎頭堵截以待官兵躡蹤殲剿而粵西頭二三
起官兵一千二百名已行抵荊州其四五兩起

日內亦可到齊臣等現在差派官兵前往飛調

來營派往陝西之粵東兵丁二千名係由荆襄

前進計期月內亦可抵楚臣等遵

旨酌留一千五百名以爲圍剿之計其餘一千五百

名仍令迅速赴陝並荏額勒登保咨會業派

盛京馬隊官兵二百名來楚而奉

旨派來帶領馬隊之侍衛富翰等五員現已到襄所

有馬隊官兵應須更換馬匹亦經預備齊全

臣

等現將大局籌佈停妥卽行緊躡追截不予以
暇總期卽就楚境剋期掃蕩奏入

上命軍機大臣傳諭明亮倭什布曰此次徐添德等
大股賊匪向當陽等處奔竄經明亮等奮力截剿
多有斬獲並因大雨時行河水長發賊匪不能逕
渡向仙居等處奔竄卽可逼歸山內聚而殲洗姜

晟厚集鄉勇在南漳一帶堵截看來伊等辦賊三人合力同心大有起色覽奏殊深欣慰此時溪河盛漲賊匪爲水所阻不能遠竄業已自投絕地實爲極好機會明亮等務當趁此時將賊匪逼歸一處悉數殲除斷不可又令他竄徐添德爲起事首犯罪大惡極必當速行殄滅如果設法生擒卽派員解京盡法處治以申國憲而快人心若臨陣殲

斃必須驗明屍身確有証據方可信以爲實但明
亮等亦不可僅將首逆拏獲遂置餘匪於不問卽
如明亮前此在陝時祇將張漢潮傷斃未能將餘
匪一律掃除以致蔓延多日直至近日始經額勒
登保奏到將陝境張漢潮餘黨全數剿淨明亮若
能將徐添德殲擒並使此股賊匪不留遺孽俾全
楚寧謐則明亮之功甚大朕必破格加恩卽姜晟

倭什布亦必同邀獎賞勉之望之至續調之廣東
廣西各兵一俟楚賊剿淨卽當令其全數速赴額
勒登保軍營以資調撥

同日

上命軍機大臣傳諭額勒登保德楞泰明亮曰上年
秋間朕令那彥成前往陝西幫同額勒登保等剿
辦賊匪原因那彥成本係軍機大臣每日召見時

於朕籌辦軍務皆所目覩深悉且正當壯年理應出力報効乃伊到陝後卽漫無籌畫帶兵深入老林追躡張漢潮餘匪自走拙路遷延多日仍任賊匪奔竄出山以致川匪乘間闖入甘境而伊赴甘追剿高二馬五一股又未辦盡任其竄入川境現又自川折回番地且朕每聞那彥成不聽人言自以爲是留在軍營轉致掣肘因令其來京詢問軍

務情形伊到京後屢次召見奏對無一的實之語
全係一片私心昨經降旨將那彥成罪狀詳悉宣
示令王大臣等詢問令其明白登答那彥成惟有
碰頭認罪不能置辯猶念伊係阿桂之孫在龍山
鎮打仗尙有微勞是以曲加寬宥用爲翰林院侍
講并諭內外諸臣除軍機大臣外毋得干預軍務
莠言煽惑所有陝西軍務責成額勒登保四川軍

務責成德楞泰湖北軍務責成明亮此時軍營既
無掣肘之人而在朕前條陳軍務者皆不過撫拾
空言毫無實際無可採納徒亂人意是以降旨禁
止川陝楚三處賊情惟以額勒登保德楞泰明亮
三人奏報爲憑奏到時朕詳加指示令軍機大臣
等書諭或所降諭旨於該處機宜未盡脗合伊等
不妨據實具奏切不可稍有遷就惟期內外一心

成功迅速至奏報打仗殺賊情形尤當字字確實
朕待額勒登保等三人以誠諒伊等亦不肯稍有
虛飾卽如官兵小有斬獲原不足爲喜或稍有挫
失亦不遽加之罰惟冀伊等三人成功受賞伊等
必當上緊籌辦務於本年秋冬之間將各股賊匪
一律殄除不可再有遲延剿辦教匪已逾四載從

前

皇考辦理準夷四部金川平定外域拓土開疆至遲亦
不過五年悉皆蕆事今教匪止係內地亂民若再
不迅速奏功實屬不成事體伊三人總以奮力剿
賊爲事不必慮及糧餉不敷近又發去四川餉銀
四十萬兩陝西餉銀五十萬兩湖北餉銀十二萬
兩並不待各督撫奏請朕卽預爲籌計先期撥給
伊等果辦賊有效何慮不源源接濟耶至剿辦賊

匪以來所謂名處官兵不下十餘萬不爲不多現已無可再添卽使再行調撥俱係新募未經訓練轉不如現在各營之兵伊等果能遵照節次諭旨將疲病不能得力官兵裁撤歸伍挑選壯健者從征不但堵剿得力兼可節省糜費以現有之兵剿現有之賊儘足辦理若能於秋冬之間依期竣事朕必綜核勞績各加懋賞酬庸倘如此愷切詳諭

不知感奮再有耽延則當執法從事不能姑貸矣